

डोगरी लोक-साहित्य च सती परिदृश्य

डॉ. जोगिन्दर सिंह

असिस्टेंट प्रोफ़ेसर (डोगरी) जम्मू – 180006

सार

भारत दे बाकी प्रदेशों आह्ला लेखा डुग्गर प्रदेश च बी केई कुप्रथां व्याप्त रेहियां। जिंदे चा इक सती-प्रथा बी ऐ ही। इस प्रथा करी केई बेकसूर महिलाएं गी अपनी जिंद गुआने पेई। इस भैड़ी प्रथा कन्नै अनगिनत घर-परिवार तबाह होई गे। डोगरी लोक-साहित्य च असंगी खुशी-गमी, आस्था-विश्वास, प्रथा-परम्परां अर्थात् सब किश दिक्खने गी मिलदा ऐ। लोक-कवियें हर इक विशेषे गी, हर इक दुख-दर्द गी अपनियें रचनाएं च थाहर दिता। सती-प्रथा दे केई उदाहरण असंगी कारकें ते बारें च लब्धी जंदे न। केई लोक अजें बी इस प्रथा दे किस्से मूंह जबानी सुनांदे न। डुग्गर च सती होने आहली पैहली महिला राजा सूरजदेव दी पत्नी नीला रानी ही, एह घटना कोई 850 ई. दी ऐ।¹ जम्मू च बी सती होने दे शुरुआती कारण मध्यकाल च मुसलमानी हमले रेह। इत्थोओं दे राजपूत बी म्हेशां लड़ाइयें च व्यस्त रौहदे हे ते ब्हादुरी कन्नै लड़दे होई शहीद होई जंदे हे। शहीदें दियां पत्नियां बी अपने पति कन्नै सती होना इज्जतमान ते शान समझदियां हियां। अपने प्यौकियें ते सौहरियें दी इज्जत-मान समझदियां हियां। पैहलें एह प्रथा सिर्फ राजपूत घराने तगर गै सीमित ही, पर बाद च ब्राह्मण ते खत्रियें दियें महिलाएं बी अपनाई लैती। डोगरी गाथाएं ते दफ्तरी रिकार्ड थमां पता चलदा ऐ जे जम्मू दे इलाके च 19वीं सदी दे शुरु च सती-प्रथा दा बड़ा मता चलन हा। इस समें च हर इक जाति दियां महिलां सती होन लगी पेदियां हियां। पैहलें डुग्गर च सती होने आहलियां महिलां अपनी मर्जी मताबक सती होंदियां हियां। पर बाद च सती प्रथा गी परिवार दी इज्जत कन्नै जोड़ी लैता गेआ ते जबरदस्ती सती करने दी प्रथा चली पेई। **शब्द: सती, साध्वी, आत्मदाह, जौहर, शिलावैती, संस्कार, कुप्रथा।**

भूमिका

भारत इक विशाल देश ऐ, इत्थें केई रीति-रवाजें, आस्था-विश्वासें, भाशाएं, परम्पराएं दा समावेश ऐ। एह सब किश प्राचीन समें थमां चलदा आवा करदा ऐ। केई रीति-रवाज, परम्परां, आस्थां, प्रथां समाज आस्तै फायदेमंद होंदियां न ते केई नुकसानदेह। भारती समाज च बी दौनें चाल्ली दियां प्रथा ते परम्परां रेहियां न। किश समें दे कन्नै-कन्नै बदली गेइयां ते किश अजें बी चला करदियां न। असें सारें गी पता ऐ जे भारत इक पुरश-प्रधान देश ऐ। महिलाएं गी मर्दे दे मकाबले च घट्ट अधिकार प्राप्त न। इस्सै करी महिलाएं गी मतियें समस्याएं दा सामना करना पौंदा ऐ। साढे समाज च अज्ज बी दाज, मुल्लें-ब्याह, भ्रूण-हत्या बगैरा भैड़ियां कुप्रथां चला करदियां न। पराने समें च एह कुप्रथां ते

समस्यां होर मतियां कष्टदायक ते अत्याचारी हियां। महिलाएं दी आर्थिक ते समाजिक स्थिति गुप्तकाल थमां गै बड़ी मती दीन-हीन (दयनीय) ही। महिलाएं गी केई कुप्रथाएं कन्नै दो-चार होना पौंदा रेहा। जि'यां बेमेल ब्याह, पर्दा, बाल-ब्याह, सती-प्रथा बगैरा मुख् रूपै च शामिल न। इ'नें सभनें च सती-प्रथा दे चलन कन्नै केई बेकसूर महिलाएं गी मारी दित्ता गेआ। एह प्रथा पूरे भारत च प्रचलत रेही।

शब्दकोशें च 'सती' शब्द दे केई अर्थ मिलदे न। जि'यां – साध्वी, पतिव्रता, अपने पति दे इलावा दूए कुसै मर्द दा ध्यान नेई करने आहली, दक्ष प्रजापति दी कन्या, शक्ति बगैरा।

विकिपीडिया दे मताबक 'सती' संस्कृत शब्द 'सत्' दा स्त्रीलिंग ऐ। जेहदा अर्थ ऐ – किश हिंदू समुदायें च प्रचलित इक ऐसी धार्मिक कुप्रथा ही जेहदे च कुसै मर्द दे मरने परैन्त उसदी विधवा होई दी पत्नी उसदे खीरी संस्कार दे दौरान ओहदी जलदी चिखा च आत्मदाह करी लैदी ऐ।

दरअसल 'सती' शब्द दा अर्थ ऐ – इक ऐसी महिला जेहड़ी छड़ी अपने पति दी होए। इक ऐसी पत्नी जेहड़ी पतिव्रता ऐ ते उसदा अपने पति दे इलावा कुसै होर मर्द कन्नै कोई सरबंध नेई होए।

साढ़े समाज च इक सोच बड़ी मती प्रभावशाली ऐ ते ओह ऐ बिना सोचे-समझे कुसै प्रथा गी जन्म देई देना। पूरी जानकारी नेई होंदे होई बी लोक परम्पराएं गी मान देन लगी पौंदे न, भामें ओह कुसै आस्तै आत्महत्या गै की नेई होए। कुसै इससै चाल्ली दी सोच दा नतीजा ही – सती-प्रथा।

सती-प्रथा गी देवी सती दे नांऽ कन्नै बी जोड़ेआ जंदा ऐ। जिसी दक्षयानी नांऽ कन्नै बी जानेआ जंदा ऐ। हिंदू धार्मिक ग्रन्थें अनुसार देवी सती ने अपने पिता दक्ष आसेआ अपने पति महादवे शिव दे तिरस्कार थमां व्यथित होइयै यक्ष दी अगग च कुद्वियै आत्मदाह करी लेआ हा। पर भगवान शिव दी पत्नी दा इस प्रथा कन्नै कोई सरबंध नेई ऐ।

चौनें वेदें, उपनिशदें, पुराणें, महाकाव्यें ते मनुस्मृति – कुसै बी धर्म-ग्रंथ च सती-प्रथा दा कोई प्रावधान नेई ऐ। रामायण ते महाभारत दौनें महाकाव्यें च बी सती कुप्रथा दा कोई उल्लेख नेई ऐ। राजा दशरथ दी मौत पर कोई बी रानी सती नेई ही होई। किशकंधा नरेश वाली, रावण, राजा शान्तनु, सौ कौख राजकुमारें ते ज्हारें योद्धें दी कोई बी पत्नी अग्गी च फकोइयै सती नेई ही होई। महाभारत च सिर्फ इक उल्लेख ऐ – जिसलै बनवास च राजा पाण्डु दी मौत होई जंदी ऐ तां ओहदी निक्की रानी माद्री ने अपने आप गी पाण्डु दी मृत्यु दा कारण समझेआ ते इससै आत्म ग्लानि दे कारण गै उस ने बी पाण्डु दी चिखा च बेइयै अपने जीवन दा अंत करी लेआ हा। इस घटना गी सती दे बजाए आत्महत्या आखना उचित होग।

कोलम्बिया इनसायक्लापीडिया दे मताबक मृत पति कन्नै ओहदी पत्नी दे मरने दी कुप्रथा दा उल्लेख भारत थमां बाहरलें देशें च बी पाया जंदा ऐ। इस च दर्ज उल्लेखें दे अनुसार थेशियन, स्किथियन, सकेनडनेवियन, प्राचीन मिस्र, चीन, ओशियाना ते अफ्रीका च ऐसे रवाज रेह न।

भारत च मौर्य ते गुप्त वंश दे काल च सती प्रथा दा कोई उल्लेख नेई मिलदा। एह प्रथा कुशान वंश दे समें भारत च विदेशें थमां आई ते मध्यकाल च राजपूत वंशें तगर सीमित रेही। राजपूत अक्सर लम्में समें तगर लड़ाइयें च व्यस्त रौहदे हे। विदेशी हमलावर जित्त हासल करने परैन्त महिलाएं कन्नै जोर-जबरदस्ती ते बलात्कार करदे हे। इस दुर्दशा दे विकल्प च 'जौहर' दी प्रथा

राजपूत परिवारें च अपनाईं गईं, जेहड़ी उस समें दी समाजिक ते राजनैतिक जरूरत ही। इस प्रथा गी इस आस्तै बी प्रोत्साहित कीता गेआ हा, जे पति दी मृत्यु परैन्त अपमान जनक जीवन जीने दे बजाए स्वाभिमान कन्नै अपने आप अपने स्तीत्व दी रक्षा करी सकन।

सती दा पैहला साक्ष्य 1510 ई. दे 'एरण' (मध्यप्रदेश) लेख चे भाणुगुप्त दे सेनापति गोपराज दी पत्नी दे सती होने दा उल्लेख मिलदा ऐ।¹ स्हेई मैहनें च भारत च मुगलें दे हमले होने दे बाद सती-प्रथा दी शुरुआत होई। मुगल शासक जित्थें बी हमला करदे, उस राजा दे राज्य पर कब्जा करने दे कन्नै गै उत्थोआं दी महिलाएं कन्नै बी बुरा व्यवहार करदे हे। इस थमां बचने आस्तै महिलां आपूं गै अगू च फकोइयै सती होन लगियां। शुरु च एह कम्म सामुहिक रूप च आरम्भ होआ। जेहड़ा बाद च कुप्रथा बनी गई ते व्यक्तिगत रूप च सती होना शुरु करी दित्ता। एह कुप्रथा इन्नी बधी गई जे बाद च महिलाएं गी जबरदस्ती पति दी चिखा च फुकेआ जान लगा। राजा राम मोहन राय दे अनथक प्रयासें दे बाद 4 दिसम्बर 1829 ई. दे 17में नियम अनुसार विधवाएं गी जिंदा फुकना अपराध घोषित करी दित्ता गेआ ते 1830 ई. च इस प्रथा दा अंत होआ। विलियम वैटिक ने सती-प्रथा पर रोक लाई ही।

डोगरी भाशा च 'सती' लेई शिलावैती शब्द दा प्रयोग बी कीता जंदा ऐ। डोगरी शब्द कोश च शिलावैती दा अर्थ ऐ – अपने सत उप्पर स्थित रहियै सती होने आहली नारी। पवितर सिंह स्लाथिया हुंदे शब्दें च – शिलावैती शब्द केवल उ'नें नारियें दे वाचक ऐ जेहड़ियां अपने स्त्रीधर्म दा पालन करदे होई आत्म बलिदान दिंदियां न। दूए शब्दें च डुग्गर समाज च शिलावैती शब्द उ'नें नारियें लेई प्रयोग होंदा ऐ जेहड़ियां अपने स्त्रीधर्म दी रक्षा जां कुसै नां कुसै पवितर उद्देश्य लेई सती होंदियां न। डोगरी च सती लेई सजोती, सकेकती ते सतवैती शब्द बी इस्तेमाल होंदे न।³

डुग्गर च शिलावैती दा अर्थ सती थमां किश बक्खरा बी ऐ। सती थमां तात्पर्य सिर्फ उ'नें महिलाएं कन्नै ऐ जेहड़ियां पति दी मौत दे बाद अपनी मर्जी कन्नै आत्मदाह करदियां न। पर शिलावैती उ'नें सारियें महिलाएं लेई प्रयोग होंदा ऐ जेहड़ियां अपने पति, पुतर, पिता दी मौत दे बाद उ'दे कन्नै सती होइयां न। डुग्गर च एह सब्भै रूप दिक्खने गी मिलदे न। इत्थें पत्नियें दे इलावा किश मामा अपने पुतरें कन्नै सती होइयां, किश धीयां अपने पिता कन्नै, किश कुआरियां अपने मंगेतरें कन्नै ते किश जगीरदारी प्रथा ते किश होर कारणें थमां तंग आइयै।

पति कन्नै सती होने आहलियां— डुग्गर च अनगिनत महिलां अपने पति कन्नै सती होइयां। इ'दे चा केईयें गी कुलदेवी दे तौर पर मन्नेआ जंदा ऐ। इ'नें गी मनने आहले हर इक खुशी दे मौके पर इ'दियें देहरियें ते स्थानें पर पूजा-अर्चना करदे न ते अपने परिवार दे बादधे-विकास आस्तै प्रार्थना करदे न। इ'दे चा किश इस चाल्ली न – सती थकियाल, सती राधका, दाती तृप्ता, सती ज्ञानो, बुआ लुहारी, दाता रणपत दी घरेआहली शुक्रा बगैरा। इ'दे इलावा दाता सरनु दी पत्नी दाती शीलावैती, दाता सुक्खू दी पत्नी दाती तारो, बावा सूरज शहीद दी पत्नी, दाता वीरम दी पत्नी दाती भुल्ली, कोल्ला शहीद दी पत्नी दाती जिमनी बगैरा बी सती होइयां हियां।

सती थकियाल रानी चिबल (Chibal) जां भिम्बर दे राजा धरमचंद चिबब दी रानी ही। एहदी कारक दे अनुसार अपने घरेआहले दे मरने दी खबर सुनियै सती होई गई ही। राजा गी इब्राहिम लोधी दे सिपाहियै मारी दित्ता हा।

सती राधका सलाथिया राजपूतें दी कुलदेवी ऐ ते एहदी देहरी गोपालसर गुढा स्लाथिया च स्थित ऐ। इ'दा ब्याह बंदरालता रामनगर दे राजा सुचेत सिंह दे कुमेदान गोपाल सिंह कन्नै होए दा हा। जिसलै ओहदी मौत सुचेतसिंह कन्नै लहौर च होई गई तां एह सती होई गई ही।

बुआ लोहारी दी देहरी सलाल ग्रां च बनी दी ऐ। एहदे घरेआहले गी बहोआल जाति दे वंशजें मारेआ हा ते एह अपने घरेआहले कन्नै सती होई गई ही।

बुआ तृप्ता अम्बारयन राजपूतें दी कुलदेवी ऐ। इंदी कारक अनुसार बुआ तृप्ता जां तृप्प मसां ब्याह बाद सौहरियें दे घर पुज्जी ही जे ओहदे घरेआहली गी उत्थों दे राजा ने सददी लैता। ओहदे बापस नेई परतोने दे ओहदा कत्ल होई जाने पर बुआ तृप्ता सती होई जंदियां न। कारक दे बोल न –

हूकम कीता नील सिंह राजे परोहत गी लेआ सदाई।
डोली लेइयै अजें में घर जे आया, तूं सेहरा खोल्लन दित्ता नाई।
घोड़ा खुल्ले दा बिच्च तवेलै, दिंदा सरपटे लाई।
बाहर बुआ हाकां लांदी परोहत लभदा नाई।
x x x x
दर्हासै कन्नै बुआ गल्लां करदी, तूं धरमां दा भाई।
तूं धरमा दा भाई दर्हासा, जिगड़ा ना तरसाई।
हत्थै दे खड़नोटडू खोल्लै, चूड़ा भन्नेआ बाहीं।
सजदा डोर थ'म्मा—ने बद्धा पंज—तिल अरघा लाई।
पंज—तिल अरघा जलाई ते अग्ग परांदै ठाही।⁴

दाता सरनू दी पत्नी दाती शीलावंती, दाता सुक्खू दी पत्नी दाती तारो, दाता वीरम दी पत्नी दाती भुल्ली ते कोल्ला शहीद दी पत्नी दाती जिमनी दे सती होने दा वर्णन हर इक दी कारक च इक्कै जनेह मिलदा ऐ। इ'नें सतियें दे नांऽ दा ते थाहर दे नांऽ दा गै फर्क ऐ। जि'यां – दाता सरनू दी कारक चा उदाहरण –

खबरां होइयां दाती शीला गी टूरी पेई कदम उठाई।
दौड़ा मारै खिटटां मारदी बिच मढै दी आई।
पति केहड़ी लोथ पछांती चरणें सीस नुआई।
लौढे बेल्लै दिन ढलैदे लै चन्नन चिखा बनाई।
धर्मी लोकें लांबू दित्ता अग्ग भड़ाकै आई।
कुल्ल कबीला ठाके पांदा कन्नै सडेआं नाई।
अग्ग ऐ ठंडी बोल न तत्ते रैहने दा कम्म नाई।
पति मेरा सुरगें गी चलेआ में एह जिद्द छड्डनी नाई।
हवन कराया तां दाती ने छाल अग्गी बिच्च लाई।⁵

दाता सुक्खू दी कारक चा उदाहरण –

खबरां होइयां दाती तारो गी टूरी पेई कदम उठाई।
दौड़ा मारै छालीं मारै बिच्च दयोली आई।
दिक्खी लाश पति केहड़ी माता चरणें सीस नुआई।
गैहरा मारु बज्जेआ सती दा दुनिया दर्शनें आई।

धर्मी लोकें लांबू दित्ता अगग भड़कै आई।
करीशनान दाती तारो बैठी चिखा बिच्च जाई।⁶

दाता वीरम दी कारक चा उदाहरण –

खबरां होइयां दाती भुल्ली गी टूरी पेई कदम उठाई।
भरथै केहड़ी लाश पछांती चरणें सीस नुआई।
लौढे बेल्लै दिनें ढलैदे लै चन्नन चिखा बनाई।
धर्मी लोकें लांबू दित्ता अगग भड़कै आई।
कुल्ल कबीला ठाके पांदा सती होया नाई।
अगग ही ठंडी बोल न तत्ते रौहने दा कम्म नाई।
हवन कराया तों दाती ने छाल अगगी बिच्च लाई।⁷

कोल्लाशहीद दी कारक चा उदाहरण –

धर्मी लोकें लांबू दित्ता अगग भड़कै आई।
करीशनान दाती जिमनी बैठी चिखा बिच्च जाई।⁸

दाता रणपत दी पत्नी शुक्रा गी ओहदी सस्सू ने हुक्म कीता हा जे ओह रणपत दे पुतरै गी जनम देइयै, 12एं ब'रें बाद ओहदा ब्याह करियै सती होए। कारका दे बोल न –

खबरी होइयां 'शुक्रा' नूहां गी नैन भरी-भरी रोई।
दौड़ां मारै डोर भोआड़ै कोल चिखा दै आई।
बोलै माता बचन करै नूहां गी गल्ल सुनाई।
आशाबैती शुक्रा नूह माता ने गल्ल सुनाई।
जिस बेल्लै पुतर होगी शुक्रे तूं सती होयां जाई।
बारां ब'रे तूं सती निं होयां माता नै गल्ल सुनाई।
बाहरं ब'रे दा पुतर होगी तूं लैयां पुतर ब्याही।
लैगी पुतर ब्याही शुक्रे फी सती होयां जाई।⁹

इस कारक थमां पता चलदा ऐ जे शायद गर्भवती महिलाएं गी सती होने थमां रोकेआ जंदा हा। 12एं ब'रें परैन्त जिसलै दाता रणपत दी पत्नी शुक्रा सती नेई होंदी तां मां आलमा सुखने च आइयै उसी सती होने दा चेत्ता करांदी ऐ। जि'यां –

अद्धी रातीं पिछले बेल्लै भित्तें गी दुहाथड़ लाई।
सनै संगलै भित्त भज्जी जन्दे संगल जंदे पटोई।
पगड़ी चूडेआ शुक्रा नूहां गी मैहलें कन्नै पटकोई
बाहरें ब'रें दा तूं बोल कीता दा सती कि'यां नेई होई।
ते पही शुक्रा दा सती होना –
लौढे बेल्लै दिन घरोन्दे गी मिलदे लाम्बे आई।
कन्नै 'पग्गा' दे सती होन्दिये सुरग लोकें गी जाई।¹⁰

देवीशुक्रा दाता रणपत दी पग्ग कन्नै सती होई जंदी ऐ।

पुतरें दी मौती पर सती होने आहलियां— डुग्गर प्रदेश च केइयें महिलाएं अपने पुतरें दी मौती पर उं'दियें चिखें च आत्मदाह करी लैता हा। इं'दे चा केइयें गी कुलदेवी दे रूप च मन्नेआ जंदा ऐ। इं'नेंगी लोक शिलावैती दे रूप च पूजदे न। इं'नें मामें दे बलिदान दी जानकारी असें गी कारकें थमां मिली जंदी ऐ।

सती नागरु, दाता रणपत दी मां आलमा, बावा ब्रह्मदेव दी माता, दाता अरजो दी माता बावा सरदारी शहीद दी माता, बावा भोतो दी मां, दाता रंगु दी मां, दाता लीखो दी मां, बुआ बचनू, ते दाती चरागु बगैरा केईं मामें अपने—अपने पुतरें कन्नै अपना शरीर त्यागी दित्ता। इं'दियें कारकें चा किश उदाहरण इस चाल्ली न —

दाती नागरु दी कारक चा उदाहरण —

हक्कां लांदा नेहरु भड़वाल दौलत पाल छोड़ेआ मार।
इन्नी गल्ल सुनियै माता नागरु बिच्च क्रोधै आई।
तुप्पी लोथ पुत्तर दौलत पाल दी बिच्च भड्डू लियाई,
बिच्च भड्डू दे दाती नागरु चन्नन चिखा बनाई।
बनाई चिखा दाती नागरु अग्ग नेई दिंदा कोई,
करड़ा हुक्म पृथीपाल भड़वाल दा अग्ग नेई दिंदा कोई।
त्रै ध्याड़े लोथ चिखा पर रेही, अग्ग निं दिंदा कोई,
ठूठा परोहत दाती गी अग्ग दिंदा लैंदा बचन कराई।¹¹

दाती नागरु भड़वालें दी कुलदेवी ऐ ते इसदा स्थान भड़डू च ऐ। कारक अनुसार पृथीपाल ने एहदे पुत्तर दौलत पाल गी मारी दित्ता हा ते एह अपने पुत्तर कन्नै सती होई ही।

माता आलमा ने दाता रणपत दी मौती पर अपनी नूह शुक्रा गी 12एं बरें तगर सती नेई होने दा हुक्म देइयै, आपूं शरीर त्यागी दित्ता हा। कारका दे बोले न —

जिन्दे पुत्तर मरी जंदे लोको, मामां जीन्दियां नाई।
हूकम करदी माता आलमां, चन्नन रुक्ख बढाई।
चन्नन रुक्ख बढाया माता नै, चन्नन चिखा रचाई।
करीशनान माता आलमां चढै चिखा पर जाई।
लौढे बेल्लै, दिन ढलैन्दे, मिलदे लाम्बे आई।
माता आलमां, रणपत दाता, सुरग लोकें गी जाई।¹²

बावा ब्रह्मदेव दी कारक चा उदाहरण —

चिखा बैठी माता लछमी नै दित्तियां हाकां लाई।
भला होऐ उस भगतै दा जो कोई लांबू लाई।

दाता अरजो दी मौत पर उसदी मां हस्सो उसदे कन्नै सती होई जंदी ऐ। कारका दे बोल न —

जिं'नें मामें दे पुत्तर मरी जंदे मामां जीन्दियां नाई।
मीं पुत्तरै कन्नै सती होना माता हस्सो ने आख सनाई।
करीशनान माता हस्सो छाल चिखा च लाई।

दाती चरागु हीरानगर च अपने पुत्र राधे कन्नै सती होई ही, जिसदी मौत सप्प पुड़ने कन्नै होई ही। इंदे इलावा केई होर मामां अपने-अपने पुतरें दी मौती पर उंदे कन्नै सती होइयां।

अपने पिता दी मौती पर सती होने आहलियां— बावा जित्तो दी कारक थमां पता चलदा ऐ जे बुआ कौड़ी गी जिसले अपने पिता दी मौती दी खबर होंदी तां ओह बड़ी रोंदी ऐ, बरलाप करदी ऐ ते खलाड़ै च पुज्जी जंदी ऐ। कौड़ी ने अपने पिता जित्तो आस्तै चिखा बनाई ते चिखा गी दाह देने मगरा, आपूं बी ओहदे च छाल मारियै उसने आत्मघात करी लेआ। कारक चा किश उदाहरण इस चाल्ली न —

‘सेहरै सिम्बलै’ आई बुआ देवी लब्धी लोथ नमानी।
लेइयै लोथ गला कन्नै लांदी अऊं बापू धी घमाई।
पे बछोड़े बूआ दे बापू, गेआ बछोड़ा पाई।
लक्कड़ियां बूआ किट्टियां करदी लैंदी चिखा बनाई।
अपनी चिखा बनाई बूआ नै, बापू दी चिखा बनाई।
ईसो गी बूआ ठाके पांदी, पिछड़ा दिक्खेआ नाई।
मारी छाल बिच चिखा दे पाँदी हरि—हरि राम ध्याई।
सुरगें दा गण उतरे, लेई गे फांगां लाई।¹³

अपने मंगेतरें कन्नै सती होने आहलियां—किश उदाहरण ऐसे बी मिलदे न जे किश महिलां अपने मंगेतरें कन्नै बी सती होइयां हियां। जि’यां — बूआ लाडो ते बूआ पागड़ी। बुआ लाडो अपने मंगेतर भाला कन्नै सती होई ही। भाला जिसलै बूआ लाडो गी ब्याहन आवा करदा हा तां रस्ते च लुटेरें उसी मारी दित्ता हा।

बूआ पागड़ी दी कारक दे मताबक, इन्नै अपने मंगेतर आसेआ आत्महत्या करने दा पता लगने पर आपूं बी आत्महत्या करी लेई ही। बूआ पागड़ी नमां शैहर च हरिजनें दी कुलदेवी ऐ।

जगीरदारी प्रथा थमां तंग होइयै जां होर कारणें करी सती होने आहलियां— बूआ भागां ने राजे दे टैक्स दे बरोध च अपनी धीऽ समेत आत्महत्या करी लेई ही। कारक दे बोल न —

जींदे हत्थ नेई औना बैरियो मरना कटारा खाई
जख्मी होइयै बूआ भागां पुज्जी घरै बिच्च जाई।
घर आइयै कुड़ी गी दुद्ध पलैंदी बेही जंदी गोदी पाई
बिच्च गोदी कुड़ी गी लैंदी दिंदी घरै गी अगग लाई।¹⁴

बूआशीलावती, दाती सत्यवती, बूआ भुक्खी, बूआ शीला, बूआ बंगालू ते केई होरनें बक्ख—बक्ख कारणें करी अपने प्राणें दी आहुति दित्ती।

उप्पर दित्ते दे उदाहरणें थमां सिद्ध होंदा ऐ जे डोगरी लोक—साहित्य च सती—प्रथा बारै खुल्लियै वर्णन होए दा ऐ। पेपर दी सीमा—रेखा दिखदे होई एह किश इक उदाहरण हे।

लोक साहित्य दे इलावा मते सारे इतिहासकारें बी इस सती—प्रथा बारै लिखेदा ऐ। एह प्रथा सिर्फ जम्मू च गै नेई कश्मीर च बी ही।

— राजतरंगिनी च कल्हण ने रानियें दे सती होने दा उल्लेख कीते दा ऐ।

— फ्रेड्रिक ड्र्यू (Frederic Drew) होरें बी जम्मू दे राजपूतें च सती दियें किश घटनाएं दा वर्णन कीते दा ऐ। ओह लिखदे न जे एह प्रथा सभनें जातियें च नेई ही, पर राजपूतें च इसदा मता चलन हा। महाराजा गुलाब सिंह दे भ्राऽ सुचेत सिंह दी मौत लाहौर च होई ही ते उं'दे कन्नै किश रानियां सती होइयां हियां। इंदियां किश रानियां ते दासियां रामनगर च हियां। सुचेत सिंह दा सिर रामनगर च आंदा गेआ ते कोई 150 दे करीब महिलां सती होइयां हियां।¹⁵

इक होर घटना च जिसलै राजा ध्यान सिंह दा पुत्तर राजा हीरा सिंह मारेआ गेआ तां उसदियां रानियां पुरमण्डल च सती होइयां हियां।

— इतिहासकार डा. राजकुमार होरें अपनी कताब "Painting and Life styles of Jammu : From 17th to 18th Centurey AD" च लिखेदा ऐ —"Painting also demonstrated another characterstic of the Dogra society that Sati system was prevalent among the royal class in the 18th century."¹⁶

— लैप्टीनैट Reynell G. Taylor होरें अपनी डायरी च 2 जुलाई 1847 तरीक गी दर्ज घटना च लिखेदा ऐ जे जम्मू दे लागे 4 घटना सती दियां होइयां।

इं'दे इलावा होर केई इतिहास दियें कताबें च सती—प्रथा दा वर्णन होए दा मिलदा ऐ। अपने—अपने राज—काल च महाराजा गुलाब सिंह ते रणवीर सिंह होरें इस प्रथा गी खत्म करने आस्तै सख्त आदेश दित्ते। पर सती—प्रथा पर पूरी चाल्ली रोक नेई लग्गी सकी। बिच्च—बिच्च महिलां सती होंदियां रेहियां। Indian Press दी रिपोर्ट मुजब सन् 1885 च महाराजा रणवीर सिंह दी मौत पर किश रानियां सती होइयां हियां। महाराजा हरिसिंह होरें अपने राजकाल च सती—प्रथा गी जम्मू चा पूरी चाल्ली खत्म कीता।

सती—प्रथा पर इक पेपर च गल्ल करी पाना बड़ा मुश्कल ऐ। एह विशे इन्ना व्यापक ऐ जे एहदे पर शोध—प्रबंध लिखेआ जाई सकदा ऐ। मता सारा लोक—साहित्य अजें बी अनछपेआ ऐ ते खोज करने पर होर सती होने आहली महिलाएं दा पता लग्गी सकदा ऐ।

संदर्भ ग्रंथ

1. डा. राधेश्याम द्विवेदी, सती—प्रथा और पुरातत्व से जुड़े चिन्ह, सफा — 1
2. S.D.S.Charak, History and Culture of Himalayan States, Vol. IV (Delhi, 1982), p. 146
3. साढ़ा साहित्य (लोक वार्ता अंक—2012), सफा — 179—180
4. ओम गोस्वामी, डोगरी लोक गाथां, सफा — 94, 95
5. ओम गोस्वामी, डोगरी लोक गाथां, सफा — 170
6. ओम गोस्वामी, डोगरी लोक गाथां, सफा — 175
7. ओम गोस्वामी, डोगरी लोक गाथां, सफा — 178
8. ओम गोस्वामी, डोगरी लोक गाथां, सफा — 157, 158
9. नीलांबरदेव शर्मा; केहरिसिंह मधुकर, डोगरी लोकगीत (कारका—बारां) भाग—दो, सफा — 42, 43, 45
10. नीलांबरदेव शर्मा; केहरिसिंह मधुकर, डोगरी लोकगीत (कारका—बारां) भाग—दो, सफा — 45
11. ओम गोस्वामी, डोगरी लोक गाथां, सफा — 99
12. नीलांबरदेव शर्मा; केहरिसिंह मधुकर, डोगरी लोकगीत (कारका—बारां) भाग—दो, सफा — 42
13. नीलांबरदेव शर्मा; केहरिसिंह मधुकर, डोगरी लोकगीत (कारका—बारां) भाग—दो, सफा — 65
14. ओम गोस्वामी, डोगरी लोक गाथां, सफा — 96



15. Mrs. Deepika Sharma, Miss Anita Rana, Social Evils Among Womens In Jammu And Kashmir During Dogra Period And Colonialism Andh Reforms (1846-1925), p. 11
16. Dr. Raj Kumar, Painting and Life Styles of Jammu : From 17th to 18th Century AD, p. 31
17. J. Pathik, Cultural Heriitage of Dogras, p. 126
18. डा. जितेन्द्र उधमपुरी, डोगरी साहित्य दा इतिहास